

Ac Crist on his tocyme us cydde oðre ðincg, 7 het us
 610 healdan sibbe 7 soðfæstnysse æfre, 7 we sceolon winnan [690]
 wið þa wælhreowan fynd; þæt synd ða ungesewenlican,
 7 þa swicolan deofla, þe willað ofslean ure sawla mid
 leahtrum. Wið ða we sceolon winnan mid gastlicum
 wæpnum 7 biddan us gescyldnysse simle æt Criste, þæt
 615 we moton oferwinnan þa wælhreowan leahtras 7 þæs f.150v
 deofles tihtinge, þæt he us derian ne mæge. Þonne beoð
 we Godes ceman on ðam gastlican gefeohte, gif we
 ðone deofol forseoþ þurh soðne geleafan, 7 þa
 heafodleahtras þurh gehealtsumnysse; 7 gif we Godes
 620 willan mid weorcum gefremmað. [700]

Þæt ealde Godes folc sceolde feohtan þa mid
 wæpnum, 7 heora gewinn hæfde haligra manna
 getacnunge, þe todræfað þa leahtras 7 deofla heom fram,
 on þære niwan gecyðnysse þe Crist sylf astealde. Secgað
 625 swaþeah lareowas þæt syndon feower cynna gefeohht:
 iustum, þæt is rihtlic; iniustum, unrihtlic; ciuile, betwux
 ceastergewarum; plusquam ciuile, betwux siblingum.
 Iustum bellum is rihtlic gefeohht wið ða reðan flotmenn,
 oþþe wið oðre þeoda þe eard willað fordon. Unrihtlic
 630 gefeohht is þe of yrre cymð. Þæt þridde gefeohht is—þe of [711]
 geflite cymð—betwux ceastergewarum is swyðe pleolic;
 7 þæt feorðe gefeohht, þe betwux freondum bið, is swiðe
 earmlic 7 endeleas sorh.